

EBÈLÙ, NSHAPÌTÀ MWIBÌDÌ 3



Nshapità wa 7, wa 8, wa 9, wa 10, lwà mwômò amu, kaa, ekèlekèle! Angàtà crayon webè ne dibèji, ne bikwabo byònsò, biikalè pabwìpi, bwalu ndi mwitabùuje ne Mukalenge neatùpèeshè cikondo cya dicyonkomoka. Mpindyewu tudi. . .

²¹⁸ Pòlò ùdì ùzànjika ne ùshikika, bilondèshìle mwaba, Mukalenge Yesu. Mpindyewu, twètu bajikije eci dilòlò edi, mu dyàlumingu mu dinda. . . Bwalu byàbùngì bya ku byòbì ebi nebiikalè mwa kubwelakana buludì mene ne Diyiiisha dya mu dyàlumingu mu dinda, bwalu “nditapulula dya bwalu bwa nsabatu.” Ndukonko lunene lùdì munkaci mwa beena Nsabatu leelu ewu. Nenu ndi muswè kunùbiikila bwa nùlwe bònsò mu dyàlumingu mu dinda. Bwalu, didì dîmpè ndyèpi, bwa dikuukwila, ndiisambombo anyì ndyàlumingu? Cidì Bible wàmba pa bwalu abu ncinyi? Nenu díbà adi, nansha ciikàle. . . Mukàndà ewu wùdì wùtapulula mikenji ne ngàsà, ne Wùdì wùtèeka cyònsò pa kaaba kàaci. Beena Ebèlù bàakakoleshiibwa ku mikenji, kàdi Pòlò ùvwa ùbàmbila mudimu wà ngàsà, ne wà mikenji.

²¹⁹ Mpindyewu, twánjàayi kupetakù anu pàà kushindamijila bitùdì twamba mpindyewu. Netwìkalè mwa kubangulula.

²²⁰ Byòbì biine, nkàadi mupetè bînetè bya kubala naabi. Pàmwàpa ndi mwa. . . Byòbì byenzèke ne mpetè lu—lutàtù dilòlò edi, ndi naabi byòbì. Nudi bamanyè ne mèmè yònsò ndi. . . Nkunshàadile anu bidimu bibidi bwa kukumbaja bidimu makumi ataanu, ne ncyèna mmòna mùmvwà mmòna kale to, pabwìpi naanyi. Pàdi lumònò lwànyì. . . Ndi mubangè kumòna myakù bibwicibwici, mvwa ngeela meeji ne nkàavwa ndwa mpofo. Mèmè kuya bwa kwenzeja mateeta. Ngàngàbukà kwambayè ne: “To. Cyùdì udi anu mupite pa bidimu makumi anaayi cyanààna, mwanàànyì.” Ee, kwambayè ne, bu mèmè mwa kushàala ne mwoyi ne kukola bikolè, lumònò ndufwànyine kwalukila cyàkàbìdì, mufwànyine kupetulula lumònò lwà pabwìpi alu. Kwambayè ne: “Mpindyewu, udi mwa kubala Bible webè wèwè mumuseemèje kule neebè anyi?”

²²¹ Mèmè ne: “Eyowa.”

²²² Yèyè ne: “Paanyimà pàà cikondo kampànda, dibòkò dyebe kadyàkwikala bule bukumbàne to.”

²²³ Ne pa nanku ndi—ndi ntèkemena mpindyewu ne, mu dilonga edi, ndi. . . Bible mukese wa Collins ewu mmwenza ne màleetà a bunene bwìmpè. Ndi mwa kuàjingulula bìmpè menemene. Kàdi patwàfika mu myaba minene ne ya ndòndò, mùdì mùkèngelà bwa twètù kwangata Dipungila Dipyadìpyà ne Dikùlukulu, ne kubitwàngaja. Ndi ne Scofield wa mukese. Ne

ntu mwibidilàngàne ne Bible wa Scofield, bimanyinu byèndè abi. Mpindyewu mèmè nciwu mbala tuubintu tufùnda twà Scofield atu to, bwalu nciwu mpetangana ne Scofield pa àbùngì a ku—ku malongesha èndè makwàtakaja awu to. Kàdi ncyà bushuwa ne ntu—ntu munangè mushindu wùdiye mulongolola, bwalu ùdi. . . Ndi nendè kùkaadi ntàntà mule, ne mmubala, kabidi bikolè be, mu mushindu wà ne ndi mmanya ne mwa kupeta cyena-bwalu cyànyì.

²²⁴ Byònsò ebi mbipyabìpyà bwànyì mèmè, bya dilongesha ebi, ne mèmè ncyèna anu mulongesha wa nsongo to. Kàdi, nwantwàlaayikù bwa katanci kakese, nènnwàmbilè Bulelèlà mùndi muBumanyè amu, nansha bya munyi.

²²⁵ Mpindyewu, ewu Mukànda m’Pòlò, ùdi bavùlùke ne, yèyè ùvwa. . . Twàkamusangana munyi? Ùvwa mulongeshi munene, anu kwònsò aku, anyì mumanyi munene wa dibàla. Ne ùvwa mulongesha mu Dipungila Dikùlukulu. Muntu ùdiku mwa kungambila mpindyewu ne tudi basangàne ne mulongeshi wendè ùvwa nganyi anyi? [Disangisha didi dyamba ne: “Gàmalièlè.”—Muf.] Gàmalièlè, umwe wa ku balongeshi bamanyike bàà mu ditùkù adi.

²²⁶ Ne pashishe Pòlò, tudi tusangana ne, dīngà ditùkù. . . Kumpàlà kwa kubiikidiibwayè Pòlò, muntu ùdiku mwa kungambila dīnà dyèndè ne ùvwa nganyi anyi? [Disangisha didi dyamba ne: “Shawùlà.”—Muf.] Shawùlà. Ne ùvwa muukòokeshi munene mu Yelusàlèrà, mukòokeshi mu maalu a ntèndeleele. Ne wàkakola bu—bu mutèndeleele, mulongesha bikole. Ùvwa mwa kwakula myakulu yinaayi anyì yitaanu mishìilàngàne, ne muntu wa meeji matwè a dikèma. Ee, dilonga dyèndè dya tùlaasà ne meeji èndè matwè awu byàkamukwacishakù anyi? To. Yèyè mmwambè ne byàkakèngela bwa kupwaye mwoyi byònsò bìvwàye mumanyè, bwa kuyìilayè Kilisto.

²²⁷ Pa nanku tudi tusangana, dībà adi ne, kabyèna bìkèngela muntu wa meeji matwè anyì mulongè tùlaasà to. Bidi bìkèngela mu—muntu udi muswè kudipwekesha kumpàlà kwa Nzambi, nansha biikàle bya mushindu kaayi.

²²⁸ Nuvwakù bamanyè ne Dwight Moody ùvwa—ùvwa mupangè mukàndà bikolè mu mushindu wà ne, bwa kwamba menemene, bìvwàye mufùnde bìvwa bishààdile mu mushindu wà nciyiku mwa kumanya ne mbinganyi to. Bìvwa bìkèngela bwa kulongololabò mayiisha èndè, dībà dyònsò. Yèyè—yèyè ùvwa mufùndi wa ciipanshì wa dikèma, mupangè mukàndà wa dikèma.

²²⁹ Nuvwakù bamanyè ne Peetèlò ne Yone, bàà mu Bible abu, bàvwa bapangè mukàndà bikolè mu mushindu wà ne kabàvwakù nansha bamanyè kufùnda mènà àbò sungasunga, ne kabàvwa bafwànyine kuàmanya òwò àsanganyiibwa kumpàlà kwabo anyi? Mupostolo Peetèlò, uvwa ne nsapi ya Bukalenge

awu, kàvwa mwa kumanya dìnà dyèndè difùnda kumpàlà kwèndè to. Elààyikù meeji pa bwalu abu. Bible mmwambè, ne: “Yèyè ùvwa mupangi ne kàyi mumanyè mukàndà to.” Pa nanku, aci’s cìdi cìmpèèshakù mpùngà’s. Amen. Eyowa’s, mukalenge. Aci cìdi cyènza anu bìmpè, bwa kusangana ne Nzambi ùvwakù mufwànyine kwenzela muntu aci.

²³⁰ Mpindyewu, nenku tudi tusangana ne, Pòlò mmwenzè anu wènza dilabula dinene. . . Ndi muswèku kunùkonka. Ndilabula bwa kulwa kùdì Kilisto anyi? Muntu ne muntu ùdi wènza dilabula anyi? Eyowa’s, mukalenge. Eyowa’s, mukalenge. N’Dilediibwa. Ndilabula. Ki mutùvwa mu Cilongelu citùmbùke cya ba-Luthériens, abidi àdi panshi aa. . .

²³¹ Mwva mupetè dyèsè mu mapingaja emu, mulwè pashiishe, mwva ne cya kwikalakù pa dîbà dikumi ne ibidi, bwa didya dya mundaamuunyà ne—ne Tom Haire. Mbanganyi bàkaadiku bumvwè bwèndè yèyè, mulwanganyi wa mvità wa disambila, mumanyike, wa cyena Irlande awu? Ne yèyè ùvwa ne Mwanèètù Epp ewu, mu ndongamu wèndè, ne mumwènèkèmwènèke mu myaba yàbùngì muneemu mu Amerike. Nenku ndi mudye nendè didya adi leelu ewu. Ne tuvwa. . . Mwva mulwè pashiishe ne mèbà bu asatu nanku awu. Tukàävwa bu pa dîbà isatu ne citùpà, anyi tusunsa dikumi ne tutaanu kumpàlà kwa dîba inaayi, patwàdì. Kàdi bìvwa anu bìmpè’s. Nenku tuvwa tuyiikilangana pa miine maalu aa, pa mùdì Yesu Kilisto mwikàle Mfumu wa bintu byònsò.

²³² Mpindyewu, pààkajandulà Pòlò byòbì ebi, wàkenza dilabula edi. Nenku dîbà adi kumpàlà kwa kwitabayè diine dilabula edi, didi ne cya kwalujiibwa ku Bible. Nenku tudi tusangana ne yèyè—ne wàkaya mu ditùnga dikwabo, ne wàkashàalamù bidimu bisatu, ùkenketa Mifùndu, bwa kumòna dilabula dyèndè ní dîvwa dya cya bushuwa.

²³³ Mpindyewu, tudi tumòna ne yèyè ùvwa mupetè cintu cinene cya kukùngamangana naaci. Bìvwa bìkèngela kwalukilayè bwa kulondela ekeleeziya wèndè, ne bantu bònsò ne, bintu mene bìvwàyè mukèngèshe abi bìvwa bilelèlà.

²³⁴ Byàkakèngelakù bwa wèwè kwenza cintu kampànda cya mushindu awu anyi? Cya bushuwa, pàmwè ne bònsò bàtu bacyènzè, bibàkèngèle kwalukila ne kwamba ne: “Bantu batùvwa tubiikila ne ‘mbansantu babùnguluki bàà mu malaba’ abu, ndi mulwè kusangana ne, mbàvwa mu bulelèlà.” Nwamònu anyi? Ki mudìbi. Byàkakèngela anu bwa twètù kukùdimuka. Ne bintu bitùvwa musangu kampànda wàwa tukìna abi, ki bitùkaadi banangè leelu ewu ebi. Ndikùdimuna dya mucima, cintu cya cikèmesha, cya pabwàci.

²³⁵ Mpindyewu, ngàmbi dîyì adi, dya “munsantu mubùnguluki wa mu malaba.” Cintu bu nanku kacitukù to. Cintu bu nanku kacitukù to. Kàdi, bàdi bàbiikila bantu nanku awu. Beena

cijila abu, Kàdi kakùtu bansantu babùnguluki bàà mu malaba to. Cintu bu nanku kacitukù to. Kakùtukù bujaadiki bwa ekeleeziya kampànda bulonda nanku awu kacya to, mu kwànyì pàànyì kumòna, mu màngumba mashilèshìilàngàne, nkàmà citeema ne makùmi asambombo ne bya mu njila awu. Kakùtukù dìngumba dya mushindu awu ne mbansantu babùnguluki bàà mu malaba to. Cidi anu—anu ndìna cyanàànà didi dyabùlù mutwè Ekeleeziya.

²³⁶ Kàdi bààkabàbìikila, mu ditùkù adi...Mbanganyì bàdiku bamanyè mwàkabàbìikilàbo mu ditùkù dya Pòlò amu? Baabuludyanganyi. Nudi bamanyè cidi *mwabuludyanganyi* ùmvwija anyi? “Mupàle.” Mbantù bapàle. Pa nanku, mèmè ndi muswè mbiikidiibwè ne “munsantu mubùnguluki wa mu malaba” pamutù pàà “mwabuludyanganyi.” Kàdi wèwè? Pa nanku pìikalàbi ne bóbò—pìikalàbi ne bóbò bààkabìikidiibwa nanku, ne kusànkabò!

Kàdi Yesu wàkamba bwetu twètù ne twènzè cinyi? Wàkamba ne: “Nùsankààyi, ne nwikalààyi ne disànkà dya dỳiila ne panshi; bwalu difutu dyenu mu Dyulu ndinene, bwalu mushindu awu ngwàkakèngeshàbo bapròfetà bàvwà kumpàlà kwenu.” Ncyàkènzàbo.

²³⁷ Wàkamba bwa: “Kwikala ne disànkà dya dỳiila ne panshi.” Cintu cya *cỳiila ne panshi* ncyà “cibàndìshìibwe kuulu menemene,” ne disànkà dya menemene. Nenku bayiidi abu, pààkasanganyìibwàbo bakùmbànyìne kwambula bundù bwa Dìna dya Yesu, bààkasànka ne disànka dinene mùvwàbo mwa kutwàla bundù bwa Dìna Dyèndè.

²³⁸ Kàdi leelu ewu, bantu bààbùngì leelu ewu, byòbi byenzèke anu ne bàmbùikilè ne mmunsantu mubùnguluki wa mu malaba, s’mmufwànyìne kubènga kulàka ne mu dikàsà ne: “Ekèlekèlè! Pàmwàpa mvwa mutùpàkàne’s, twamb’eku twamb’eku.”

Kàdi bóbò bàvwà ne disànkà bwa cyòci aci ne: “Kaa, ekèlekèlè, bwa kwambula Dìna!”

²³⁹ Nenku mpindyewu, mu bidimu nkàmà yibidi, bààkabàbìikila ne *byambula-nkùrusè paanyimà*. Apu mpàvwà beena Kilisto ne ciibidilu cya kwenda bambùle nkùrusè paanyimà, bwa kuleeja ne bàvwà bapoopèdìibwe pa nkùrusè pàmwè ne Kilisto. Bààkabàbìikila ne *byambula-nkùrusè paanyimà*. Mpindyewu ndi mumanyè ne beena Katolike bàdi bàdìbìikila mushindu awu, kàdi awu kàvwà ekeleeziya wa Katolike nansha. Ùvwà ng’ekeleeziya wa Mishòònyì kumpàlà kwa kubìikidiibwayè ne ng’ekeleeziya wa Mishòònyì. Kààkatontolola cìngà cintu to anu mpekaatu. Cidìbo bàmbùikidila ne ng’ekeleeziya wa Mishòònyì leelu ewu’s mbwalu wàkatontolola mèyì ma—maswika a Katolike. Kàdi ùdi...Yèyè, ùcìvwà anu, kàvwà wa dikòsololangana mwine

musangu awu to, pààkabàbiikilàbo ne m'byambula-nkùrusè paanyimà apu.

240 Anjì angàtaayi anu maalu-malonda a Josèphe ne a bafùndi bakwabo, ne *Baabùlònà Yibìdì* ya Hislop ayi, ne bikwabo, nenùsanganè ne ncyà bushuwa ne, bóbò abu kabàvwakù ekeleeziya nansha. Ekeleeziya wa nzànzànzà wa kudìvwija bulongolodi, ùvwa ng'ekeleeziya wa Katolike, bidimu bitwè ku nkàmà yisatu, paanyimà pàà kasumbù kàà—kàà bapostolo bàà ndekeelu. Bidimu bitwè ku nkàmà yisatu paanyimà, ekeleeziya wa Katolike kudìvwijayè bulongolodi. Ki dikèngeshiibwa kubweladi, ne kwenzejadi bantu ku bukole bwa kubwelabò mu ekeleeziya wa Katolike, nenku, kufikishabò ekeleeziya ne mbùlámàtadi ku didisanga.

241 Aci cìvwa mpaanyimà, pa dikùdimuna dya mucimà dya Constantin, dya ku dìnà adi, dya kuumuka ku bumpàngaanù kuya ku cyena-Katolike. Kàdi, bu muntu kanà yònsò ewu mwa kubala bwalu-bulonda bwèndè, yèyè kàvwakù mukùdimùne mucimà to, bwa bintu biine byàkenzàye abi. Kaa, ekèlekèle! Cintu cìmwèpelè cya butèndeledi cìvwayèkù mwenzè cìvwa nkwasà kwa nkùrusè pa ekeleeziya wa Sainte Sophie. Ki cintu cìmwèpelè cìvwayèkù mwenzè, cyenza mene mu butèndeledi. Yèyè's ùvwa mu—muntu moonèke. Kàdi nyawù bàcibìikila ne ndikùdimuna dyèndè—dyèndè dya mucimà. Cìvwanangana anu ne makùdimuna a mucimà a ku dìnà a leelu ewu aa.

242 Mpindyewu, kàdi, tudi tusangana ne, Pòlò yèyè pààkakùdimunàye mucimà ne kwenza dilabula dilelèlè edi, kakùyi mpatà to yèyè ùvwa mukùdimùke.

Nenku, nudi bamanyè's, *dikùdimuna dya mucimà* didi dyùmvwija ne “mukùdimùke.” Wèwè wenda uya mu *nùnku*, kàdi ukùdimuka ubanga kwalukila mu *nùnku*. Eyowa's, mukalenge. Ndikùdimuka's, utàngila kùdì ufùma.

243 Nenku Pòlò, mmwenzè anu ùkùdimuna mucimà, kumpalà mene kwa kwenzayè dilabula dyèndè... Mpindyewu, yèyè wàkenza dilabula dya dikèmesha's.

Mpindyewu, ndi ngiitabuuja ne, paùdì witabuuja Kilisto, anu bu Musùngidi webè sungasunga cyanàànà apu, ndilabula. Ndi ngiitabuuja ne, disànkà dya kumanya ne mpekaatu webè wáfwidiiibu luse adi, didi ditùpisha anu mwoyi webè ne disànkà, mu mishindu yònsò.

244 Kàdi pashiishe pàdi Nyuma Mwímpè mubènesha ùpweka, aci ndilabula, Dilediibwa dipyadiyà adi, diwikalà kuyikù mwa kupwà mwoyi to. Udi ulwa Mwânà wa Nzambi. Nenku cìdì cìcyènza ncyôci eci. . .

“Udi ucimanya bìshi, Mwanèètu Branham?”

245 Mpindyewu, aa mmàleesònà a dilongesha. Bantu bààbùngì, ba-Méthodistes, bàdi bàteeta bwa kwamba ne: “Bààkeela

mbilà pàakaMupetàbo.” Ee, aci’s ncìmpè. Wèwè muMupetè, ne mwelè mbilà, eyo. Bwalu wedi mbilà, kacivwa cimanyinu cya ne wâMupeci to, bwalu bààbúngì mbeelè mbilà kàdi kabàyi baMupetè to.

²⁴⁶ Beena Mpenta mbambè ne: “Bààkaakula mu myakulu. BààkaMupeta.” Abi mbìmpè. Pawikalà mwakùle mu myakulu, ne muMupetè, eyo. Kàdi udi mwa kwakula mu myakulu kàdi kùyi anu muMupetè to. Nnanku anyi?

²⁴⁷ Pa nanku, nudi numòna’s, ndekeelu wa byònsò, ndilabula dya kuumuka ku lufù kuya ku Mwoyi; pàdi bintu bikùlukulu byònsò bifwa, ne bintu byònsò bìlwa bipyabipyà. Kilisto ùdi ùlwa wa cya bushuwa. Bintu bikùlukulu bitùuka bìya, miji ya kale ya maalu a musunya ayi. Nutu bamanyè mwa kuumbula muji kuwùjoomona anyi? Kale wàwa tuvwa twangata mpikì ne tubanga anu kuumbula kwìnshì kwàwù aku, ne tuwùmbula too ne pàdimu kamùciyi mùshààla kantu kààwù nansha kakese to. Nenku bàvwa bàmba ne: “Kwòkù muji wà bululu wùtòloka munda mwebe, ùwùjoomònè.” Ncya bushuwa. Nenku cyòci aci ki cìdi Nyuma Mwìmpè wènza, ùjoomona miji yònsò. Ùyùjoomona. Ùyùngwija mushiki; ùyòòsha. Ùyùmùshè. Udi upeta dinowa dìmpè dìbà adi, twètù benzè nanku.

²⁴⁸ Mpindyewu, Pòlò wàkamanya ne cintu kampànda cyàkenzeka, ki kwalukilayè e kuya mu Arabie, ne mwòmù amu kulongayè munda mwa bidimu bisatu pa bidì bitàngilà bapròfetà bàà Dipungila Dikùlukulu, mùvwàbo bambè bipròfetà. Ki kufikayè ku dijandula ne Cìvwa m’Bulelèlèlè bwa kabùyi dyela mpatà nansha.

²⁴⁹ Mpindyewu, pàlakajàayi aci ne leelu ewu, nwamònu’s, pa dilabula ditwàkenzè apa ku ekeleeziya mukese ewu adi: dya Mutooto wà mu Dinda wàkamwènekà kuntu kwàka awu, Bukènkè bunene bwàkapwekà abu, bùvwa bùdyànjilà kwamba ne kuleeja maalu àvwà ne cya kwenzeka abu. Nudi bamanyè’s, aci’s ncya cikèmesha’s. Kàdi mwambi naanyi kungambilayè ne cìvwa ncya dyabùlù. Kàdi mèmè—mèmè ncìvwa mwa kucyùmvwakù to.

²⁵⁰ Pa nanku, ncyàkambakù cintu nansha cìmwè pa bwalu abu to too ne bufukù kampànda, kwenzekakù dilabula kampànda ku Green’s Mill kwàka, mu Indiana, pààkendelà Mwanjelo wa Mukalenge panshì apu ne kwimanaYè mwaba awu, ne kucijaadikilaYè ku Mifundu. Dìbà adi kuteemeshaci kapyà. Dìbà adi kwasaci lwendu.

²⁵¹ Kàdi anu mu dyàlumingu dyàshàadi edi, tudi bamòne bimanyinu bidì kabiyi bipangila bya Yesu Kilisto, Yèyè udi mwa kwangata muntu utu kàyikù mwanjì kwendela kuulu to, ne kàyikù. . . Mujilu wèndè wùdi wùmujaalamijà awu mumanè kufwà, piine apu mpàdi beena Mayo ne bangàngàbukà bàà batàmbe bwìmpè bambè ne: “Nkujikè, bwa kashidi.” Ne

musòmbe mpofu; kujuukayè kuulu ne kupàtukayè mu citanda, wènda ùpuusa dikalù dyèndè dya balèma ùtùlukila naadi pa bibàndilu, mwikàle mwa kwenda ne kumòna anu mùdì muntu mukwabo yònsò ewu. Aci's cidi cileeja ne mbukolè bwa Mukalenge Yesu mubiike ku lufù. Ki bwalu abu's. Yèyè ùdi umwèumwè awu makèlèlèlè, leelu, too ne kashidi.

252 Pa nanku katwènakù kasumbù kàà disànka dilòòlò edi, pa kumanya ne Nzambi mmushìndike dilabula dinene ditùdi naadi edi, bwa kudipàlakaja ne Bible Wendè ne milayi ayi anyi? S'ki bwa cinyi bìvwa bikèngela twètù kwikala ne disànkà dya dìyiila ne panshi. Nenu dîbà adi tudi tufika ku dimanya ne, mu nshapità mwi2, tudi tusangana ne: “Kabivwa bikèngela twètù kulekela maalu aa... Kabivwa bikèngela twètù kulèngulula maalu aa nansha.” Bivwa bikèngela twètù kwikala bakwàte bikolè maalu awu.

Nenu *mmunyi mutwikalà mwa kupànduka, twètù balèngùlùle lupàndù bunene nunku, . . .*

253 Citwènzà twètù aba ncinyi, mu bukènkè bwa Dîyi dya Nzambi, patwikalà tukàadi biimàne ku Cibàsà cya ku Cilumbulwidi? Kwèna mwa kwamba ne: “Kacya ncivwakù mumanyè dishiilangana” to. Kaa, eyowa's, wèwè's uvwa mumanyè. “Ee, mpindyewu, Mwanèètù Branham mmufwànyine kwikala mu ntùpàkànyì.” Aci ncilelèlè. Kàdi Nzambi kàtu ùtùpakana to. Dîyi Dyèndè kî ndya mafi to. Kàdi anjì elààyikù anu meeji, bwa cintu cimwecimwe aci, Bible, uvwa ne mwoyi musangu kampànda mu bapostolo awu ne, ùdi cyàkàbidi ne mwoyi. Kaa, Dîna dya Mukalenge dibeneshiibwè's wè!

254 Pàndì ngeela meeji ne nkàadi ne bidimu makumi anaayi ne mwandamukùlù, ngiipacila makumi ataanu, ne matùkù àànyì a bunsongà àkaadi mayè, ne bikwabo; pa kumanya ne kacya anu pàncivwà mwànà mukese apu nkàavwa ne Mulayi mubènesha ewu, ne muWàmbilàmbile bânà beètù bàà balùme ne bàà bakàjì; ne pa kumòna binunu anu pa byòbi bya bàdi bapàtùke mu mîdimà abu, pa kumanya ne kutùyaayà nku Cisòmbedi cyetu cya Cyendelele, kùdi babènèshiiibwe. “Ne piikalà ntentà wa pa buloba ewu mwa kunyanguka,” kumpalà kwà mèmè kujikija kuyiisha, “kùdi mukwabo mutwìndile mwàmwa.” Aleluuyah! Pa kumanya ne kùdi makumi a bantu basòmbe kaaba aka, ne, bu bôbò mwa kushiyangana ne mwoyi ewu mpindyewu mene, kumpalà wa twètù kukafikisha mubidi wàbò kwà mujiiki wa bafwè, bôbò mbafwànyine kwikala mu mubidi wà butumbi awu mwàmwa, bàcyònkómoka ne bansantu bàà Nzambi, bàmànè kwikala mu Bwikadi bwa Nzambi, bwa kwikala ne mwoyi bwa kashidi. Biikàle ne cishindiki cipwàngàne, cya kakùyì mpatà to ne ki mùdìbi! Amen.

255 Kaa, aci's ncifwànyine kwelesha ba-Presbytériens mbilà's! Ncyenzè nanku mu dyàlumingu, kî mmwòmò anyi? Bantu abu

bàvwa ba-Presbytériens. Ncifwànyine kwenza cya bushuwa's, pa kukwèlela meeji. Kaa, kabyèna bikèmesha to mùdì bantu bàsaluka! Mòna's, pìikalàbi ne wèwè udi usaluka bwa dituuta dya ndundu anyi dyela dya ndundu mu kabòndo, ambà tǔng mwabèngàbi kukusalula pa kumanya ne udi muumùke ku lufù muyè ku Mwoyi, ne udi Cifùkìibwà cipyacìpà mu Kilisto! Udi mucìmanyine ku mushindu wùdì nyuma webè ùkulombola ùkuumusha ku budimù, ne ku lubombo, ne ku lukunà, ne ku bintu byònsò bya pa buloba. Ne mwoyi webè mmusòmbe mushìndamijila pa Kilisto. Ki tubingìlà twebè ntwòtò atu. Ki cyònsò cyùdì welela meeji mu mutù wèbè, mu mwoyi wèbè, ditùkù dijimà ne bufùku bujimà. Paùdì uya kalààla bufùku, ne utèeka byanza mu dikoshi, mushindu *ewu*, ne ushààla anu mudyòlòle mwab'awu ne uMutùmbisha too ne paùdì uya mu tulù. Ubiika, mu dinda, mutùngùnùke anu ne kuMutùmbisha. Amen. Kaa, ekèlekèle!

²⁵⁶ Mémè nkààdikù muteetè bwa kuMutùmbisha. Mu dinda, tudì tubiika lwà pa dîbà inaayi, mémè ne Mwanèètù Wood, tupàtuka dinda bwebwebwe, bwa kuya kalemba nshìndì. M'Mutùmbishila mwinshì mwa mucì ne mucì ne wònsò, mùndì mfika, ngeela meeji. Ncyènàku mwa kumòna mucì, nciyi mMutùmbisha to. Ngeela meeji ne, Yèyè ngudi mutòlwèshe mucì awu. Mmòna kapasu kakese kàà kale kàbùuka; Yèyè mmumanyè kapasu aku. "Kaa," wèwè udi wamba ne: "macimbu's, Mwanèètù Bill." Kaa, to, kî mmacimbu to. Yèyè's mmumanyè kùdì nshìndì yònsò ùsanganyiibwa. Mmumanyè kùdì cibèyìbèyì cyònsò cisanganyiibwa.

²⁵⁷ Mòna's, musangu kampànda, Yèyè ùvwa dijinga ne mfrangà, ki Yèyè ne: "Peetèlò, kùdì mushipa kampànda, kwènjì mutancì, mumine cinjànjà cya mfrangà, mmikùmbàne, búngì bùdì bütùkèngelà. Ndà ùkeelè ndòbò muntwamu. Mémè nèngùtùmè mwab'awu. Ùpatulè cinjànjà cya mfrangà aci mukana mwàwù, bwalu wòwò kakwèna mwa kukwàta naaci mudimu to, wòwò mwine. Ùye kamufuta cyàdiikùmi cyetu ne citàdì." Amen.

²⁵⁸ Ne kùkaadi ndambù wa mbingu, mvwa mumòne kaamushipa kakese kashebeya, kalààle pa màyi. Nukààdi bònsò bumvwè bwalu bwàkù abu. Mwanèètù Wood nyèyè wàwa, ne mwanààbò wa balùme ne bakwabo kaaba aka bwa kucìfidila bujaadiki. Kaamushipa aku kalààle kafwè kùkaavwa tusunsa makumi asatu, pa màyi apu, ne twàmunda twàkù tupàtwila ku mishìku. Ki Nyuma Mwìmpè munene awu kupwekaYè, paanyima pàà Mumanè kwamba, ditùkù dishààle ne: "Neùmònè dibìikà dya ku lufù dya kanyama kakese." Nenku pàakacyàbu mu dinda, paanyimà pàà dîbà dibànde ndambù, twètù kumòna kaamushipa aku, kakàyi kapìte bule *ebu* to. Pààkapwekà Nyuma wa Mukalenge awu, kwamba ne: "Kaamushipa wa yààyà, Yesu Kilisto wàkwondòpù." Ki kaamushipa kafwè aku, kàvwà kalèlème pamutù pàà màyi kùkaavwa tusunsa makumi asatu

bulubulu aku, kwalukilakù ku mwoyi ne kuyakù kènda kòwela ne mwàkù mwònsò. Kaa, Dìna dya Mukalenge dibeneshiibwè. Mushindu mwine wùdiYe ùkèmesha's wè!

²⁵⁹ Kabyèna bikèmesha to pàvwà Pòlò mwa kwamba, ne: “Yèyè ùvwà mu mulongo wà Melekisedekè.” Yèyè ùvwà Melekisedekè. “Melekisedekè kàvwa ne mbangilu wa matùkù to. Kàvwa ne ndekeelu wa bidimu to. Kàvwa ne ntwadijilu wa mwoyi anyi ndekeelu wa mwoyi to. Kàvwa ní ne taatù ní ne maamù to.” Pa nanku, Kàvwa mwa kwikala kampànda mukwabo to. Nansha byòbi ne Yèyè ùvwà Nganyì, Ùcidi anu ne mwoyi dilòòlò edi. Pa nanku, kùdi mushindu wùmwèpelè wà Mwoyi wà Cyendeleele, ne mwine awu ngwà Nzambi.

²⁶⁰ Dilòòlò dishààle patùvwà twenza muyiiki, mwanèètù kampànda kàvwakù mwa kuumvwa busatu bwa Nzambi to, ne mutùvwà tubwamba. Mùvwà Yesu mwimàne mwab'awu, Muntu, wa bidimu bitwè ku makumi asatu. Ki kwambaYè. . .

Kwambabò ne: “Kaa, baataatù beetu's bààkadyà manà mu cipèèlà.”

²⁶¹ Yèyè ne: “Kàdi bòbò, muntu ne muntu, s'mbafwè.” Kàdi kwambaYè ne: “Mémè ki Dyàmpà dya Mwoyi adi didì difùme kùdi Nzambi mu Dyulu, didì muntu ùdya kàyì ùfwa to.”

²⁶² “Kaa,” mwàkambàbo, “baataatù beetu's bààkanwà ku Lubwebwe mu cipèèlà.”

²⁶³ KwambaYè ne: “Mémè ki lwòlò Lubwebwe alu.” Muntu wa bidimu makumi asatu's. Yèyè ne: “Abraham wàkasànka bwa kumòna ditùkù Dyànyì.”

²⁶⁴ “Mòna's,” mwàkambàbo, “mpindyewu Udi muswè kutwàmbila ne Wèwè udi ne bidimu búngì bùmwè ne Abraham's, Pèèbè kùyì mwanjì kwikala ne bidimu makumi ataanu to, kàdi wamba mÙdi mumòne Abraham ukàadi mufwè kùkaadi bidimu nkàmà mwandamukùlù awu anyi? Bwa mpindyewu kaayi twàmányì kwòkù ne Wèwè udi ne démon. Udi mupàle.” Ki cìdi. . . Aci ki cìdi *démon* ùmvwija's, “muntu mupàle.” Bòbò ne: “Udi ne démon, ne Udi mupàle.”

²⁶⁵ Yèyè ne: “Kumpàlà kwa Abraham kwikalayèku, NDI.”

²⁶⁶ Ki Yèyè awu uvwaYè. Yèyè kàvwa anu muntu pàtupù to, anyi Kàvwa mupròfetà to. Yèyè ùvwà Nzambi, Nzambi musòmbèle pa buloba mu mubidi wà musunya bàwùbìikila ne “Yesu,” Mwànà wa—wa Nzambi mwandàmùke mubidi. Ki Yèyè awu uvwaYè menemene.

²⁶⁷ Mpindyewu, nyewù tuMusangana apa, ciine aci mu citùpà cya ndekeelu mpindyewu, cya dyoya naaci nshapità mwi2, kùmvwà muswè kafika, mbangila ku mvensà wa 16, anyi ku mvensà wa 15.

Ne wàkasùlula aba. . .ku bwòwà bwa kufù—bwa lufù bàvwà matùkù àbò ònsò a mwoyi balama mu bupika.

Ki cidiye mwambè ne ncyàkenzà Yesu ne, Yèyè wàkalwa bwa kubàsùlula ku bupika, bóbò bàvwa mu bwòwà bwa lufù matùkù àbò ònsò a mwoyi abu.

268 Mpindyewu kakwèna bya diciìna dya lufù abi to. Mpindyewu, mu bushuwa bwa bwalu, tutu tuciìna; twètù, muntu nansha umwe wa kutùdi kàtu muswè kufwà to, citùdi tubiikila ne, *kufwà* aci. Kàdi nutukù bamanyè ne muntu yèyè mulediibwe cyàkàbidì kèna mwa kufwà anyi? Mmunyi mùdiye mwa kwikala ne Mwoyi wà Cyendelele kàdi pashiishe kufwà? Kèna mwa kufwà to. Cintu cimwèpelè cidi lufù, mwakù *lufù*, wùdi wùmvwija ne “ditàpuluka.” Mpindyewu yèyè neàtapulukè ne bwikadi bwa mèsù ètù twètù. Kàdi ùdi misangu yònsò anu mu Bwikadi bwa Nzambi, ne mmwikalàye misangu yònsò. Pa nanku, lufù kî ncintu cikolè nansha. Lufù ncintu cya butùmbi. Lufù ndùdi lùkatùfikisha mu Bwikadi bwa Nzambi.

269 Kàdi bwa mpindyewu, mu bushuwa bwa bwalu, twètù, bu bantu, tudi twendela mu bintu bya mîdimà ebi pànwapa, katwèna—katwèna tucyùmvwa mùvwàbi bikèngela bwa twètù kucyùmvwa to. Ne, mu bushuwa bwa bwalu, pàdi bisaamà bya lufù bidì bipàtakajanganà abi bilwa, bidì bifikisha muntu mwine wa kutùdi wa mutàmbe kusantuka awu ku diciìna ne dyalukila cyànyimà. Byàkafikisha Mwànà wa Nzambi ku dyamba ne: “Lupànzà elu kalwèna mwa kupitakù anyi’s?” Ncintu cya cikwàcisha bwòwà. Kanùcyùmvù bibi to. Bwalu tudi. . . Ncibawu cya mpekaatu, lufù alu, ne bùdilu naabù mbwà kwikala lwà lùkwàcishangana bwòwà.

Kàdi bu twètù anu mwa kutàngila dyàmwàmwà dya ridò, mwàmwa, ki mùdi bwalu búsanganyiibwa. Mukalenge àbeneshiibwè’s wè! Anu dyàmwàmwà dya ridò adi, ki kùdi muntu ùjinga kutàngila dilòòlò edi. Anna Mae Snelling mwànà ne bakwabo abu kale wàwa bàvwa bimba musambu ewu ne: “Mukalenge, Ndekèlè Ntapèku Dìsù Dyàmwàmwà Dya Ridò Wa Cikondo.” Bantu bònsò mbaswè kumòna aci.

270 Mpindyewu, mpindyewu bwalu mbwòbù ebu, mu mvensà wa 16. “Bwalu ncyà bushuwa ne Yèyè kàakangata . . .”

Bwalu ncyà bushuwa ne yèyè kàakangata, pambidi pèndè ngiikàdilù wa banjelo to, kàdi wàkangata pambidi pèndè dimiinu dya Abraham.

271 Kaa, tudi baswè cyàkàbidì kushààla bakwàte ku cyòci aci mpindyewu. Mpindyewu tuyààya buludì ku dyangata . . . Bwalu, citùpà cya kumpalà cya nshapità mwi3 ewu, citùpà cyèndè cya ndekeelu, cidi cibwelakeena pa “ditùkù adi bwa nsabatu,” bwa dyàlumingu dilwalwà edi.

272 Mpindyewu tàngilàayi.

. . . yèyè kàakangata . . . ngiikàdilù wa banjelo to, . . .

Mpindyewu, “Yèyè” awu nganyi, udiyè wàmba awu? Kilisto. Kilisto Nganyi? Nzambi, Logos wa Nzambi.

²⁷³ Mpindyewu ngänji kuumvwijulula eci, bwa nwikalè batwishüibwe. Nzambi kätu Nzambi yisatu to. Busatu bwa Nzambi büdi Umwe. Taatü, Mwänà, Nyuma Mwimpè, kí mbwena kwamba ne küdi Nzambi yisatu mishilàngàne to. Byôbì nanku, tudi bafwànyine kwikala bampàngaanü. Kí bwa cinyi beena Yudà kabèèna mwa kuumvwa to. Kacya kacitukü cilongèshüibwe mu Bible to. Mpindyewu, ncilongèshüibwe mu ekeleziya wa Katolike, kaküyi mpatà to, mwômò amu mmüdi dibàtiiza dya nzambi yisatu mu umwe difùmìne.

²⁷⁴ Mu Afrike bàdi bàkubàtiiza misangu yisatu cyâdì panshi: musangu wùmwe bwa Nzambi Taatü; musangu wùmwe bwa Nzambi Mwänà; musangu wùmwe bwa Nyuma Mwimpè. Mpindyewu, aci nntüpàkányi. Malongesha a bu nanku a cyôci aci kaätukü mu Bible to. Nwamònu anyi?

²⁷⁵ Nenku mpindyewu, aci—aci ncidìbo bôbò balongeshe. Ncilwilè mu Luther; cipätüke mu Luther, cibwelè mu Wesley; anu nanku mu bikondo pàvwàci cyènda cisükumuka apu. Kàdi kacìvwakü dilongesha dya mu Bible to. Cìvwa misangu yònsò anu ntüpàkányi, kacya anu kwàkabangäci aku.

²⁷⁶ Mpindyewu, pa nanku, Nzambi üvwakü ku cibangidilu. Kumpälà kwà kwikalakü bukènkè kampànda, kumpälà kwà kwikalakü kapwishipwishi kampànda, kumpälà kwà kwikalakü mutooto kampànda, kumpälà kwà kwikalakü cintu kampànda cya cimwèneka, Nzambi üvwa muujè cibwàshibwàshì cijimà. Ne mu Cyôci aci müvwa anu bukezüke pa bwôbü: dinanga dikezüke, cijila cikezüke, bwakàne bukezüke. Cìvwa n’Nyuma. Üvwa muujè cibwàshibwàshì cijimà kubangila anu ku Cyendeleele, kutüdi twètü katüyikü mwa kuCìpima to. Ncipite too ne cintu kanà cyònsò citüdüku twètü bafwànyine kudìfwànyikijila aci.

²⁷⁷ Byenzè müdi ku lumwènü lwälwa, tudi bafwànyine kumòna miliyò lukàmà ne—ne bya mu njila ya bidimu bya cibwàshibwàshì cya bukènkè. Elàâyibi meeji. Miliyò lukàmà ya bidimu bya cibwàshibwàshì cya bukènkè. Pààbi bukènkè—bukènkè büdi büya lubilu lwà lwìpacila kilòmèètà binunu dikumi ne bibidi ne nkàmà mwandamukülü ku kasunsa. Ne miliyò lukàmà ya bidimu bya cibwàshibwàshì cya bukènkè. . . Anji elàayi anu meeji ne mbifwànyine kwikala miliyò ya kilòmèètà búngì kaayi. Kwèna mufwànyine mene kuyibala kumana to. Udi anu mwa kwangata mulongo wà biteema kubifünda kunyünguluka naabi Jeffersonville, kàdi küyi anu mufwànyine kukafikapü mu kilòmèètà ya kilòmèètà to. Elàâyibi meeji. Ne dyàmwàmwà dya cyôci aci kucikàle anu mitooto ne mabülunga. Kàdi Nzambi, kumpälà kwa cyònsò cya ku byôbì abi kwikalakü, Yèyè üvwakü. Nwamònu anyi?

278 Nenku mpindyewu Logos ùvwa mupàtùke mu Nzambi awu, mwine—mwine ùvwa Logos awu, byònsò ebi byàkabanga kwangata mbù—mbùngakeenu wa mubidi. Ne mwine mbùngakeenu wa mubidi ewu wàkabiikidiibwa, mu dilongesha dya bamanyi bàà mabàla ne, Logos, Logos wàkapàtuka mu Nzambi awu. Mu ngaakwilù mukwabo, mwakù wàci wà—wà mutàmbe bwìmpè, wùvwa ngutùdi tubiikila ne n'tèòfànì awu. (Tèòfànì mmubidi wà buntu wùdi mutùmbishìibwe.) Kawùyi anu menemene ne musunya ne mashi mwikalàwu mu citùpà cyàwù citùmbishìibwe aci to, kàdi mmushindu wà mubidi wà buntu wùdi kawùyi wùdya, anyì kawùyi wùnwa to, kàdi mm—mmubidi, mubidi wùdi mutwìndile pàdìbi anu ne twapàtuku mu ewu ewu. Mpindyewu, mwòmò amu, tudi tubwela mu mubidi awu. Ne ki mushindu wà mubidi wùvwa Nzambi awu, bwalu Wàkamba ne: “Twènzàayi muntu mu cimfwànyì cyetu sungansunga ne mu difwàngana neetù.”

279 Mpindyewu, pàakabwelà muntu mu mubidi awu, ùvwa ne bukòntononyi pa mishipa yònsò, ne nyuunyi, ne—ne nyama ya mu mpàta. “Kàdi dìbà adi kakùvwa muntu bwa kudima buloba to,” Genese 2. Wàkamana kwenza mulùme ne mukàji, kàdi kakùyi muntu bwa kudima buloba to.

Pashiishe Nzambi kwenzaYè muntu ne lupwishi lwa buloba. KumupèeshaYè cyanza bu—bu mùdi cya nsòkòmuntù. KumupèeshaYè dikàsà bu mùdi dya ours. Wàkamupèesha, Wàkamwenza, mu cimfwànyì aci. Kàdi mubidi wà pa buloba ewu wùdi mu cimfwànyì cya mwoyi wà nyama, ne mmwenza ne bintu bya mushindu wumwewumwe awu abi. Mubidi wèbè awu mmwenza ne bintu anu bya mushindu wumwewumwe ne bya kabalù, anyì bya mbwa, anyì bya cintu kanà cyònsò cya nanku awu. Mmwenza ne kàlisiyumù, binshidimba, mpiitùloolù, bukènkè bwa mu cibwàshìbwàshì. Wèwè kwèna anu. . . Misunya yònsò mùdiyu amu kì mmisunya ya mwomùmwè to; mmisunya mishìilàngàne, kàdi mmyenza ne lupwishi lwà buloba kùdiyi mifùme.

Kàdi, dishìilangana pankaci pàà nyama ne muntu ndya ne, Nzambi mmutèèke musùukà munda mwa muntu, kàdi kì mMuwùtèèke munda mwa nyama to. Bwalu, musùukà wùvwa munda mwa muntu awu ki yèyè tèòfànì awu.

Kaa, ndi—ndi, ncyàkafikakù ku. . . dilleesònà edi to, kàdi bikèngela ngàmbèku eci.

280 Tàngilàayi. Kanwènaayikù nuvùluka pàvwa Peetèlò mu bùlokò ne, Mwanjelo wa Mukalenge wàkalwa kukàngula biibi anyì?

281 Tuvwa tupicila mu màkàjiinyì a byàkudyà kaaba aka, ditùkù adi, ne ciibi kuunzulukaci kumpàlà kwetu. Mèmè kwamba ne: “Nudi bamanyè's, Bible ngukàävwa wa kumpàlà ne cya

nanku.” Nwamònu anyi? Mpindyewu, nciibi cya cidỳùnzulukila, cidinjila, nkààyaaci.

282 Nenukù pààkapàtùkà Peetèlò, wèndela ku luseke kwà balami aba, bàvwa bafofomija bwa kabàmumònu to. Kupitayè mulami wa munda, mulami wa pambèlu, kubwela mu bulà, kupìcila mu cimanu, kupàtuka e kumata mu mùsèèsù. Ne nansha umwe wa kùdìbo kààkamanya ne ùvwa nganyì to. Ne kabàvwakù batèye ntèmà...Bààkeela meeji ne ùvwa mmukwabo mulami anyi cintu kampànda. Bòbò...Kupàpìcilayè anu cyanààna, ki ciibi kudikàngukilaci, pàvwayè ùpàtuka apu, ne kudikàngaci paanyimà pèndè. Nenukù pààkapàtùkàyè pambèlu apu, kudyàm̀bidilayè ne ùvwa ùlòòtà. Ki kupwekayè too ne kwà Yone Maakò, kùvwàbo bènza disangisha dya milòmbò. Ki kukòòkolayè...[Mwanèètù Branham ùdi ùtuuta bintu pa cyambilu. Katùpà kàà mukàbà wa mèyi munda mutupù—Muf.]... bwa kwikalayè munkaci mwenu.

283 Kaa, Yèyè's ngwa butùmbi. Yèyè's ngwa ùkèmeshangana.

Mpindyewu, kaa, *yèyè* kàvwa mwenza mu mmwènekèlu wa mwanjelo to; *kàdi wàkangata... dimiinu dya Abraham pambidi pèndè. Nzambi wàkalwa dimiinu dya Abraham.*

284 Mpindyewu, bu twètù ne dîbà, bwa kwalukila cyànyimà ne kuleeja mwàkaènzàYe mu Cipungidi aci! Nukàadi bangumvwè nyiishapù, misangu ne misangu, mwàkangatàye nyama ayi ne kuyipanda munkaci, ne kwelayè kaamàndànkùci ne nkudimba mwómò amu. Pashiishe kutàngilayè, ne kumònayè kaamwìshì kakese, bwòwà bufilike, lufù. Pashiishe, cikùtù cya kapyà cìfwima mìshì, iferno. Kàdi, dyàm̀wàm̀wà dya aci, mùya kaaBukènkè kakese katòòke. Nenukù katòòke kakese aku kààkapìcila munkaci mwa cipese ne cipese cya mulambù mukòsa awu, bìleeja cìvwàYè mwa kwenza. Nenukù Wàkenza mucipu, pààkenzàYe nanku awu apu, ne Wàkafùnda Cipungidi, ùleeja cìvwàYè mwa kwenza.

285 Nenukù Yèyè, Yesu Kilsto, wàkalwa pa buloba; Nzambi, *Èmanùwèlè*, “Nzambi mu mubidi.” Ne ku Kalvariyo, Wàkapanðiibwa mu bitùpà. Nenukù Nyuma Wèndè wàkaalukila pa Ekeleeziya. Ne mubidi Wèndè wàkabàndishiibwa muulu ne wàkasòmba pa Nkwasa wa butùmbi wa Nzambi.

Nkwasa wa butùmbi wa Nzambi! Yèyè udi pa Nkwasa wa butumbi awu ngudi Mulumbulwishi. Aci tudi bamanyè. Ee, Cilumbulwidi cidi penyì? Taatù mmufile...Yèyè kèna ùlumbulwisha muntu nansha umwe to. Kàdi Taatù mmufile dilumbulwisha dyònsò kùdì Mwànà. Nenukù ki cidiYe. Ne Mwoyi Wèndè ki Mwakwidi Munene, musòmbe mwaba awu ne mubidi Wèndè Sungasunga, bu mulambù, bwa kutwàkwidila pa bitùdì tujikula. Amen. Mwanèètù, aci's cidi citèèkakù cintu kampànda munda mwebe's.

286 Mònaayi: “Wàkangata Dimiinu dya Abraham.” Wàkalwa Muntu. Nzambi, muvwijiibwe mubidi munkaci mwetu, bwa kutùpikula. Mu ngaakwilù mukwabo, Nzambi wàkalwa mpekaatu, bwa twètù bangènzàmpèkààtù twamòna mwa kulwa baMwabanyanganyi. Nenku patùdi baabanyanganyi Bèndè, tudi baabanyanganyi bàà Wèndè. . . Twètù tuvwa bantu bakòsela cikondo, makumi mwandamutekète. Nenku Nzambi wàkalwa pa buloba ne wàkalwa umwe wetù, makumi mwandamutekète, bwa cikondo Cyèndè cikòsa, bwa twamòna mwa kwikala bàabanyanganyi bàà Mwoyi Wèndè wà Cyendeleele. Ne patùdi tulediibwa cyàkàbidi, tudi bàà bàà balùme ne bàà bakàjì bàà Nzambi, ne tudi ne Mwoyi wà Cyendeleele, ne katwàdyàkufwàku to.

Kaa, Musùngidi mubènesha kaayi—kaayi—kaayipu’s wè! Kaa, kakwèna mushindu wà kucifùnda to. Kakwèna mushindu wà kucyùmvwija to. Ncipite dyumvwija kule ne kule. Muntu nansha umwe kèna mwa kuumvwija mùdici cinène to. “Mushindu mwine wÙdi munene’s wè! Mushindu mwine wÙdi munene’s wè!” ngwa cya bushuwa.

Ki bwa cinyi mu maalu ónsò bìvwa bimwimikila bwa kuvwijiibwayè mufwànàngàne ne bàà bààbò, . . . (Elàayi meeji ku bwalu abu.) . . . bwa wàmòna mwa kwikala mwakwidi munene wa luse ne lulamatu mu maalu àdì àtàngilà Nzambi, . . . (Tèèlejèjàayi eci.) . . . bwa kwenza dipungisha . . . bwa mpekaatu wa bantu.

Kupungisha, mpindyewu, Nzambi, mumanyè bwakàne, kukèngelabi bwa kulwaYè bubì, bwa kuumvwaYè ne kwikala ngènzàmpèkààtù kùdi munyi, bwa kwalukilaYè bwa kupungishangana, ku “dipungishangana,” ne kwikala ne luse kùdi bantu.

287 Mvensà udi ulonda awu, Cìtèèlèjàayi kaaba aka.

Bwalu mu bìvwàye yéyè mwine mukènge abi . . .

288 Nzambi kàvwa mwa kukènga mu Nyumà to. Bìvwa bìkèngela bwa kulwaYè mubidi, bwa kuumvwa mikenyi ya bubèèdi, kuumvwa diteeciibwa dya dyalakana, kuumvwa diteeciibwa dya lukèngelu lwà bintu, kuumvwa diteeciibwa dya nzala, kuumvwa bukolè bwa lufù. Bwa Wàmòna mwa kucyàmbula pambidi Pèndè Yéyè mwine bwa kwimana mu Bwikadi bwa Yehowah Nyuma munene awu, Nyuma, kàyi Muntu to; Nyuma, bwa kwakwila mwoyi ewu. Nenku Yesu wàkangata aci, bwa kwenzaYè ditwàkwila, bwalu Yéyè mmumanyè mùdici cyùmvwika. Paùdi usaama, Yéyè mmumanyè mùdi umvwa. Paùdi uteeciibwa, Yéyè mmumanyè mùdi umvwa.

289 Mpindyewu, ukààdikù mumòne patùdi twela tukàndà bwa kusungula mfùmù wa ditùnga, cidimè yònsò neèlè kakàndà bwa mfùmù wa ditùnga uvwa cidimè, bwalu mmumanyè luseke

lukolè lwà nsòmbelu wa buucidimè. Nwamònu anyi? Mmuswè muntu kampànda udi umvwa.

²⁹⁰ Nenku kumpàlà kwa Nzambi kufika Yèku ku dyumvwa (Yèyè mwikàle Cijila cinène aci, mmunyi mmùvwà Yèkù mufwànyine kuumvwa paanyimà pàà Yèyè mumanè kupiisha muntu? Ku cijila Cyèndè aci, nkùdì Ye mupiiishile muntu.), ne mushindu wùmwpèlè wàmanyà Yèkù mwa kubingisha muntu ngwà kulwa muntu.

²⁹¹ Nenku Nzambi wàkabwikila virgo awu ne mundidimbi ne kulelayè mubidi, kaciyi mashi a mwena Yudà to, kaciyi mashi a muntu wa Bisàmbà bya bendè to, kàdi Mashi Èndè Sungasunga. Mashi mafùka a Nzambi, bya mulùme ne mukàjì to nansha bikese, kamùyikù dijinga dya mulùme ne mukàjì to nansha dikese. Nenku Kabùlù kàà Mashi aka, kafùka munda mwa mukàjì ewu, kutwàlakù Mwànà awu. Ne pàakabàtiiiibwà Ye kùdì Yone Mubàtiii, Yone wàkamba ne: “Ndi mfilà bujaadiki ne, ndi mumòne Nyuma wa Nzambi (mwenzè bu nyuunyi wa nkuci) ùpweka ne ùsòmbela pamutù Pèndè.”

²⁹² Kabyèna bikèmesha to mùvwà Yesu mwa kwamba, ne: “Makolè ònsò mu Dyulu ne pa buloba mmafidiiibwe mu cyanza Cyànyì.” Nzambi ne muntu bàakalwa Umwe. Maùlu ne buloba byàkuupukilangana, ne Yèyè nguvwa Ewu uvwa mwa kufila dipungishangana bwa mpekaatu wetù. Ki bwa cinyi, mu Dìna Dyèndè, dyondopiibwa didi dyènzeka. Yèyè mmumanyè mikenyi ya disaamà dyebe.

²⁹³ Nukààdikù bumvwè kaamusambu kakese, kàà kale aka anyi?

Yesu mmumanyè mikenyi ya disaamà yùdì umvwa ayi, Yèyè ùdì mwa kusungila ne Ùdì mwa kwondopa;

Ndà ne bujitu bwebe kùdì Mukalenge ùkabùshiyèku.

Ncya bushuwa. Yèyè mmumanyè.

Pàdì mubidi wètù mucibùlùkè ne mikenyi ya màsaamà, ne twètù katùciyi mwa kupetulula bukolè bwetu bwa mubidi,

Vùlukà anu ne Nzambi mu Dyulu ùdì wàndamuna ku disambila;

Yesu mmumanyè mikenyi ya disaamà yùdì umvwa ayi, Yèyè ùdì mwa kusungila ne Ùdì mwa kwondopa;

Ndà anu ne bujitu bwebe kùdì Mukalenge ùkabùshiyèku.

²⁹⁴ Ki cyònsò cìdìYe ùlòmba: “Bùshiyè wèwè anu kwòkù aku.” Bwa cinyi? Yèyè ngudi Mwakwidi wetù Munene udi mwimàne kaaba aka, udi mumanyè byùdì umvwa abi. Ne Yèyè mmumanyè mwa kukupungisha bwa kukwaluja ku ngàsà, ne

mwa kukwaluja ku bukolè bwebe bwa mubidi. Yèyè mmumanyè byònsò abi, Yèyè wàkakènga. Pawàpangà mwaba wà kutèèka mutù, Yèyè ùvwa ne bya mwomùmwè abi. Pawikalà ne bilàmbà bya civwàdilu anu cimwè, Yèyè ùvwa ne cya mwomùmwè aci. Pawikalà wa bèelulwila, wa bàkèngesha, Yèyè ùvwa ne bya mwomùmwè abi.

295 Tèèlejààyaaku mvensà wa ndekeelu mpindyewu. Eyo.

*. . . mmukùmbàne bwa kukwàcisha aba bàdi
bateeciùbwe.*

Anyi, mu ngaakwilù mukwabo, Yèyè mmukùmbàne bwa *kukwàcisha* bôbô abu, bwa *kwambulwisha* bôbô abu, bwa kufikisha bôbô abu. . . bwa *kubùmvwila luse*. Bwalu, Nzambi Yèyè mwine wàkalwa muntu, bwa kucyùmvwawè.

296 Nudi bavùlùke, dilòlò adi, katùvwa balongèshepù anyi? Mwàkakèngelàbi bwa Nzambi. . . Lufù lùvwa ne kalonda, ne bwôwà mu lwòlò. “Matùkù àbò ónsò bàvwa mu bupika bwa bwalu bwa *lufù* elu.” Ki pashiishe Yesu kulwaYè, bwa Wàmòna mwa kupàtula kalonda aku mu lufù.

Ne pàvwàYè wènda ùbànda mukùnà apu, nudi bavùlùke mutùvwà bacifwànyikije anyi? Tuumakeji tukese tukese tukünze atu pa cinkutu Cyèndè, paanyimà pàà mutanci twònsò atu kulwatù ciidikeji cinene cimwèpelè, kuMutampakaja Mashi pambidi pajimà. Kaamubidi Kèndè kakese, katekètàngàne aku, Yèyè kàcìvwa mwa kuya kule to, ki kudishindaYè. Simònà wa ku Kulènè, muntu mufiike, kuMwambulwishayè bwa kubànda ne nkùrusè awu pa kakùnà apu.

Nenku pàakaMupoopelàbo ne misonso pa nkùrusè, Yèyè wàkeela lubilà lukolè ùlòmba màyi. Muntu kanà yònsò udi uzònta mashi ewu udi dijinga ne màyi.

297 Nudi bavùlùke pàmvwà muyiishè dilòlò adi anyi pa “Kashà, ngulungù ùdi ujinga kasulù kàà màyi, bya mwomùmwè musùukà wànyi wùdi wùKujinga, Èyi Nzambi”? Pàdi kashà katàpiùbwe mpùtà ne kiikàle ne mwoyi, munkaci mwa kujimija mashi, bikèngela kàfikè ku màyi bwa cyanàànà nekàfwe.

298 Bàkangàasakù cingoma, mu mpàta, pàncìvwà ne bidimu dikumi ne binaayi. Nenku mvwa mulàadika mwaba awu. Mikòlò yànyi misùnsula mwinshì mwànyi, byenzè mùdì dyàmpà dipàya minyiinyi, bangaasè ne cingoma cya calibre 12. Ki mèmè kwela lubilà lukolè ndòmba màyi ne: “Kaa, mpèeshaayikù màyi a kunwèè!” Mvwa mukwàcike tukùlàkàji; mishikù yànyi yivwa mikwàcike tukùlàkàji.

299 Mulundà wanyi kuyayè lubilu ku cijibajiba cya kale, cìvwà ne tusàndà twà tukese twà kale twà mishindu yònsò, twà mu cisensè. Ncyàkacyùka ne bìvwa mbinganyi biine abi to. Ki kutuntayè kucyùja tètè ne màyi, ne mèmè kushààla kacya ngàlekelela mukana mutùbula, ne yèyè kukàminamù cifulu

cyèndè aci nùnkú ewu, mukana mwànyì. Eyowa, bìvwa bikèngela mpetè màyi.

300 Yèyè ùvwa ùzònzà mashi. KwambaYè ne: “Mpèèshaayikù màyi.” Ki kuMupèèshilabò mvinyò wa bwanji ku musukulampampa, kadi kumusàkilaYè kwàka, ne kumubèngàYè. Yèyè ùvwa Mwànà wa mukooko wà Nzambi mwikàle ùpùnga ne lufù pa kaaba keetu, bwa kutwádila muntu dipungisha. Cívwa ncinyi? Nzambi wa mu Dyulu.

301 Billy Sunday wákamba musangu kampàndà, ne: “Cisuku ne cisuku cyònsò cívwa ne Banjelo biikilemù, bamba ne: ‘Wèwè lekèlèlà anu cýanza Cyebe Ùfunkunè munu, Twètù netùshintululè maalu.’”

302 Musùmbà wà bakoleshi bàà maalu bàà mu ntèdeleelu bapangè maalu bàba, kubiikilabò bamanyi banene bàà mabàla balongè túlaasà biikàle ne màpòlomè a D.D., Ph.D., kuyabò tàmàkàtàmàkà too ne kùdìYe aku ne kwambabò ne: “Mpindyewu, wèwè ní udi Mwànà wa Nzambi, s’ukàadi musùngile bakwabo, wèwè mwine kùyi mwa kudisùngila. tùùlukà ku nkùrusé aku, nenku netùkwitàbùjè.”

303 Kabàvwa bamanyè ne bàvwa munkaci mwa kuMwela kàalumbandi to. Yèyè’s ùvwa mufwànyine kwikala muDisùngile. Kàdi bu Yèyè muDisùngile, Kàvwa mwa kusùngila bakwabo to. Pa nanku, Wàkadifila Yèyè mwine. Dìnà Dyèndè dibeneshiibwè. Wàkadifila Yèyè mwine, bwa mèmè ngaamòna mwa kusùngidiibwa ne wèwè wamòna mwa kusùngidiibwa. Kaa, dinanga kaayi dya kadiyi kufwànyikija’s wè!

304 Kabìvwa bikèngela bwa kusaamaYè to. Kabìvwa bikèngela bwa mubidi wà musinga mukolè mulela kùdì virgo awu kusaamawù to. Kàdi Yèyè wàkasaama, bwa Wàmanyakù mwa kungaakwila pàngàakasaamà apu.

305 Kabìvwa bikèngela bwa Yèyè kuumvwa bwalu bùMutonda to, kàdi Wàkuumvwa. Musangu kampànda ngàkabala kaabwalu kakese pa bwalu abu, ncyèna mumanyè ní kàvwa kajaadikiibwe anyi to. “PàakabiishàYe mwànà wa balùmè wa ku Nayìnà awu kuntu kwàka apu, ku lufù, Wàkasòmba pa dibwe ùtwa mikèmù ya mutù ùsaama,” bwalu bìvwa bikèngela bwa kwambulaYè bubèèdi bwetu.

306 Bìvwa bikèngela bwa kwambulaYè mpekaatu wetù, s’ki Yèyè wàkafwà wàwa, ku Kalvariyo aku pàakapàyikà lubùlùbùlù lwà kale ne lufù kalonda kàalù apu. Muntu kanà yònsò ewu mmumanyè ne, pàdi lubùlùbùlù lùpàyikà kalonda kàalù, kalwèna mwa kusùmangana kabidi to. Pàdi lubùlùbùlù lùbùùka anyi cìshì kampànda cìtù cìsùmanganà eci, pàdici anu cipàyikà kalonda kààci, cìdi cìpàtula cìshìya kalonda aku. Lwòlò lùdi anu lubùlùbùlù kàdi kalùciyi ne kalonda to. Cintu cimwèpelè cìdilu mwa kwenza nkuvuma mvùùmvùùmvùùm ne kwenza mutooyi búngì cýanàànà.

³⁰⁷ Ki cintu cìmwèpelè cìdì lufù mwa kwenzela mwena kwitabuuja ncyôci aci, nkwenza mutooyi búngì cyanààná. Kàdi, aleluuyah, Dîná dya Mukalenge dibeneshiibwè's wè, Yéyè mmucimpìke kalonda kàà lufù aku mu mubidi Wèndè Sungasunga. Emanùwèlè ngwákacyènzà. Wàkabiika ku lufù, mu ditùkù diisâtù, kunyùkulula kalonda aku ne kukàpàtulamù, ngwa kàyi ùfwa dilòòlò edi. Ne Nyuma Wendè ùdi mu citanda emu, ne Ùdi ùjaadika mùdìYe ne mwoyi munkaci mwetù. Ki Maasiyà wetù nyawù. Ki Musùngidi wetù mubènèshìibwe nyawù.



EBÈLÙ, NSHAPÌTÀ MWIBÌDÌ 3 LUA57-0828
(Hebrews, Chapter Two ³)

DILONDANGANA DYA MALONGESHA PA MUKÀNDÀ WÀ EBÈLÙ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisâtù dildòlò, mu matùkù 28 a ngondo wa mwandamukùlù, cidimu cya 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org